



## BANTUAN AKUAKULTUR - TERNAKAN KETAM, IKAN SANGKAR PENGUSAHA PERAK TENGAH

3 Jun 2023, Perak Tengah – Jabatan Perikanan Malaysia (DOF) telah mengaturkan satu lawatan kerja melibatkan YBhg. Datuk Lokman Hakim Ali, Ketua Setiausaha Kementerian Pertanian dan Keterjaminan Makanan (KPKM) ke Projek Ternakan Ketam Nipah Crab Universe Sdn. Bhd. di Bagan Datuk dan Projek Ternakan Ikan Dalam Sangkar Kluster Emponea Enterprise di Bota, Perak.

Di Malaysia, pengeluaran ketam adalah daripada perikanan tangkapan dan akuakultur sebanyak 15,945.84 tan metrik. **Tahun 2021 – perikanan tangkapan 15,740tm (98.7%) dan akuakultur 205.84tm (1.3%).**

Bagi perikanan tangkapan, pendaratan ketam adalah dari jenis ketam nipah, ketam laut, ketam renjung dan ketam batu dengan menggunakan peralatan pukat hanyut, pukat tunda, pukat rentang dan bubu/bintoh ketam.

Pengeluaran ketam daripada akuakultur melibatkan ketam nipah sahaja dalam bentuk kulit lembut (**soft shell crab**) dan kulit keras (**hard shell crab**). Ketam nipah yang diternak adalah daripada spesies *Scylla olivacea*, *Scylla paramamosain*, *Scylla tranquebarica* dan *Scylla serrata*.

Penternakan ketam nipah dijalankan dalam air payau menggunakan sistem kolam, sangkar, tangki dan kandang.

**Pengeluar utama ketam nipah (akuakultur) adalah Sabah (150.07tm ~ 72.9%)** diikuti Perak(39.68 tan metrik), Johor (6.19 tan metrik), Sarawak (5.37 tan metrik), Kedah(1.24 tan metrik), Selangor (1.28 tan metrik), Terengganu (1.76 tan metrik) dan Pahang (0.6 tan metrik).

Crab Universe Sdn. Bhd. yang diterajui oleh Mohd Adib Fadhil bin Azlan dan Soh Chee Weng memulakan ternakan ketam nipah dengan modal sebanyak RM500,000. Sebanyak 5 tangki x 500 L (kultur larva ketam), 5 tangki x 2,000 L (asuhan peringkat megalopa) dan 1,000 kotak ketam (ternakan) ditempatkan di kawasan hatcheri dan ternakan seluas 1.25 hektar bertempat di Selekok, Bagan Datuk, Perak.

Ketua Pengarah Perikanan, YBhg. Dato' Adnan bin Hussain berkata Jabatan Perikanan Malaysia (DOF) telah meluluskan bantuan Input ternakan melalui Mesyuarat Jawatankuasa Sistem Penyampaian dan Khidmat Sokongan (SPeKS) Akuakultur 2023 sebanyak RM15,000 bagi perolehan tangki PVC ternakan ketam.

Jabatan Perikanan turut mengadakan lawatan ke penternakan ikan air tawar iaitu tilapia yang diusahakan oleh Emponea Enterprise di Bota, Perak. Terdapat 31 petak ditempatkan di kawasan seluas 0.23 hektar.

Spesies utama pengeluaran akuakultur air tawar ialah tilapia merah, keli dan patin. Pada tahun 2021, pengeluaran ikan tilapia merah menyumbang sebanyak 25,064.65 tan metrik dan sebanyak 5,683.37 tan metrik merupakan pengeluaran ikan tilapia daripada negeri Perak. Seramai 1,045 orang penternak akuakultur air tawar Negeri Perak dan kira-kira 366 orang penternak mengusahakan ternakan tilapia merah.

Menurut Dato' Adnan juga, Emponea Enterprise telah menerima berjumlah RM528,500.00 (30 petak sangkar bersaiz 3m x 3m dan lain-lain input sokongan operasi akuakultur) di bawah geran pemadanan Program Pembangunan Integrasi Akuakultur (PPIA) – Sistem Sangkar Bersepadu yang diluluskan pada tahun ini.

Kenyataan media ini disiarkan oleh:

**UNIT KOMUNIKASI KORPORAT**

Ibu Pejabat, Jabatan Perikanan Malaysia

Wisma Tani, Putrajaya

Email : ukk@dof.gov.my ; pro@dof.gov.my



Edit with WPS Office